

續  
文  
獻  
通  
考

續文獻通考卷之一百六十二

皇明進士雲間王圻纂輯

兵考 禁衛兵 郡國兵上

禁衛兵

宋理宗寶慶元年十一月給京軍緡錢 紹定元年七月  
留元英奏諸路州軍僚屬私役禁軍乞下帥司約束違  
者以聞從之 三年二月臣寮奏乞捕禁衛兵額戒內  
侍毋得私役革貨號修火政以肅宮禁從之 五年四  
月李日邁奏乞行下諸郡招選放散軍人驍勇可用者  
填廂禁軍闕額從之 淳祐元年八月詔馬軍司選子  
弟強壯者一百人補龍衛雲衛武衛三指揮闕額

述

遼御帳親軍有大帳皮室軍太宗置凡三十萬騎有屬珊

單地皇后置凡二十萬騎

腹心曰皮室精美如珊瑯者曰屬珊

宮衛騎軍太祖以迭剌部受禪分本部爲五院統以皇族而親衛缺然乃立幹魯朵法裂州縣割戶丁以建宮衛入則居守出則扈從葬則因以守陵有兵事則五京二州各提轄司傳檄而集不待調發州縣部族十萬騎軍已立具矣恩意親洽兵甲犀利教練完習簡天下精銳置之腹心之地此軍制之良者也

弘毅宮

初爲幹魯朵腹心曰莽宮曰幹魯朵太祖以腹心之衛益以勃海俘錦州戶置在臨漢府

正丁一萬六千

背漢轉丁一萬四千

騎軍六千

長寧宮

初為蒲速益幹魯朵與達曰蒲速益應天皇太后以遼州及海濱縣等戶置在高州

正丁一萬四千

番漢轉丁一萬二千

騎軍五千

永興

初為國阿鞏幹魯朵牧國曰國阿鞏太宗以太祖渤海俘戶及懷州雲州澤州等戶置在游古河側

正丁六千

番漢轉丁一萬四千

騎軍五千

積慶宮

初為耶魯益幹魯朵與盛曰耶魯益世宗以文獻皇帝衛從及太祖俘戶雲高宜等州戶置在

東土河

正丁一萬

番漢轉丁一萬六千

騎軍八千

延昌宮

初為奪里本幹魯朵討平曰奪里本穆宗以國阿鞏幹魯朵戶及阻卜俘戶咸信韓等州戶

置在紀雅里南

正丁二千

番漢轉丁六千

騎軍二千

彰愍宮

初為監母幹魯朵遺留曰監母景宗以章肅皇帝侍衛及母安州戶置在合魯河

正丁一萬六千 番漢轉丁二萬 騎軍一萬

崇德宮

初爲孤穩幹魯朵王曰孤穩承天太  
后以乾頭雙三州戶置在土河東

正丁一萬二千 番漢轉丁二萬 騎軍一萬

興聖宮

初爲女古幹魯朵金曰女古聖宗以國阿  
耶魯益滿速益三幹魯朵戶置在女混活直

正丁二萬 番漢轉丁四萬 騎軍五千

延慶宮

初爲萬篤益幹魯朵孛思曰窩篤益興  
宗以諸幹魯朵及饒州戶置在高州西

正丁一萬四千 番漢轉丁二萬 騎軍一萬

太和宮

初爲阿思幹魯朵寬大曰阿思道宗以諸幹  
魯朵御前承應人及與中府戶置在好水濼

正丁二萬 番漢轉丁四萬 騎軍一萬五千

永昌宮

初爲阿魯益幹魯朵輔祐曰阿魯益天祚帝  
以諸幹魯朵御前承應人及泰宣州戶置

正丁一萬四千 番漢轉丁二萬 騎軍一萬

敦睦宮

初為赤實得本幹魯朵孝曰赤實得本孝文皇太弟以文獻皇帝承應人及渤海俘建瀋岩三

州戶

正丁六千

番漢轉丁一萬

騎軍五千

文忠王府

耶律隆運謀橫振季父房無子天祚帝以皇子教魯幹繼之擬諸宮例建文忠王府

正丁一萬

番漢轉丁一萬六千

騎軍一萬

十二宮一府自上京至南京總要之地各置提轄司重

地每宮皆置內地一二而已太和永昌二宮提轄司不

見蓋闕文也凡諸宮衛丁四十萬八千出騎軍十萬一

千

軍職制設北面詳穩司者有左皮室軍右皮室軍北皮

室軍南皮室軍黃皮室軍屬珊軍舍利軍皆領皇族護

衛者也外有卽君軍拽刺軍旗鼓拽刺軍千拽刺軍猛  
拽刺軍墨離軍礮手軍弩手軍鉄林軍大鷹軍鷹軍鶻  
軍鳳軍龍軍飛龍軍虎軍熊軍左鉄鷄子軍右鉄鷄子  
軍龍衛軍威勝軍天雲軍特蒲軍三尅九尅等軍有事  
則領以大元帥都元帥或便宜元帥又或自將焉其南  
面諸衛軍有親衛勳衛翊衛左右衛驍衛左右武衛左  
右威衛左右領軍衛左右金吾衛左右監門衛左右千  
牛衛左右羽林衛左右龍虎軍左右神策軍左右神威  
軍又有侍衛親軍侍衛控鶴侍衛漢軍四軍歸聖宣力  
四捷天聖等軍皆在京城內走卒曰拽刺

金禁軍之制本于合扎謀克合扎者言親軍也以近親所  
領故以名焉貞元遷都更以太祖遼王宗幹秦皇宗幹  
之軍爲合扎猛安謂之侍衛親軍故立侍衛親軍司以  
統之舊嘗選諸軍之材武者爲護駕軍海陵又名上京  
龍翔軍爲神勇軍正隆二年將南伐乃罷歸使就僉調  
後于侍衛親軍四猛安內前云太祖遼王秦王猛安凡  
三今云四猛安豈太祖兩猛  
安耶選三十以下千六百人騎兵曰龍翔步兵曰虎步以  
備宿衛五年罷親軍司以所掌付大興府置左右驍衛  
所謂從駕軍也騎兵置都副指揮使隸點檢司步軍置  
都副指揮使隸宣徽院太定初親軍置四千人改防城  
軍爲武衛軍掌京師巡捕二十二年省親軍爲三千五



百上京亦設守衛軍是年尚書省奏上京既設皇城提舉司亦當設軍守衛上曰可設四百二十馬一百二十分三番更代異時朕至上京即作兩番巡警限以半年交替人日給錢五十米一升半馬給芻粟猛安謀克可差年四十上下者軍士並取三十以上者充軍章宗承安四年增爲五千又增至六千又有威捷軍又增簽弩手千人凡選弩手之制先以營造尺度杖其長六尺立之謂之箭杖取身與杖等能踏弩至三石鋪弦解索登踏閑習射六箭背上朶內二箭中貼者又選親軍取身長五尺五寸善騎射者猛安謀克以名上兵部移點檢司宣徽院試補之又設護衛二百人近侍之執兵仗者

也取五品至七品官子孫及宗室并親軍諸局分承應人身長五尺六寸者選試補之又設控鶴二百人皆以備出入者也

元

元制宿衛諸軍在內而鎮戍諸軍在外內外相維以制輕重之勢方太祖時以木華黎赤老溫博爾忽博爾木爲四怯薛及分番宿衛及世祖時又設五衛以象五方始有侍衛親軍之屬置都指揮使以領之而其後增置改易於是禁兵之設殆不止於前矣夫屬橐鞬列宮禁宿衛之事也而其用非二端用之於大朝會則謂之圍宿軍用之於大祭祀則謂之儀仗軍車駕巡幸用之則曰

扈從軍守護天子之帑藏則曰看守軍或夜以之警非  
常則爲巡邏軍或歲漕至京師用之以彈壓則爲鎮壓  
軍

世祖中統二年初設控鶴五百四人以劉德爲軍使領之  
至元八年七月置左右中三衛親軍都指揮使司

十三年六月命征東元帥府選襄陽生勝軍五百充侍  
衛軍 十五年五月選江南銳軍爲侍衛親軍 十六

年詔諭行中書省選南軍精銳者二萬人充侍衛軍併  
發其家赴京師仍給行費鈔萬六千錠 十二月增置  
宿衛凡宿衛每三日一更申酉戌日博爾忽領之爲第  
一怯薛郎也可怯薛博爾忽早絕太祖命以別速部代

之而非四傑功臣之類故太祖以自名領之其云也可  
者言天子自領之故也亥子丑日博爾木領之爲第二  
怯薛寅卯辰巳木華黎領之爲第三怯薛巳午未日赤  
老溫領之爲第四怯薛赤老溫後絕其後怯薛常以右  
丞相領之凡怯薛長之子孫或由天子所親信或由宰  
相所薦舉或以其次序所當爲即襲其職以掌環衛雖  
其官卑勿論也及年勞旣久則遂擢爲一品官而四怯  
薛之長天子或又命大臣以總之然不常設其他預怯  
薛之職而居禁近者分冠服弓矢食飲文史車馬廬帳  
府庫醫藥卜祝之事悉世守之雖以才能受任使服官  
政貴盛之極然一日歸至內庭則執其事如故至於子

孫無改非甚親信不得預也其怯薛執事之名則主弓矢鷹隼之事者曰火兒赤昔寶赤怯憐赤書寫聖旨曰扎里赤爲天子主文史者曰必閣赤親烹飪以奉上飲食者曰博兒赤侍上帶刀及弓矢者曰云都赤瀾端赤司閤曰八剌哈赤掌酒者曰荅刺赤典車馬者曰兀刺赤莫倫赤掌內府尚供衣服者曰速右兒赤牧駱駝者曰帖歹赤牧羊者曰火你赤捕盜者曰忽刺罕赤奏樂者曰虎兒赤又名忠勇之士曰霸都魯勇敢無敵之士曰拔突其名類蓋不一然皆天子左右服勞侍從執事之人其分番更直亦如四怯薛之制而領於怯薛之長若宿衛之士則謂之怯薛歹亦以三日分番入衛其初

名數甚簡後累增爲萬四千人揆之右制猶天子之禁軍是故無事則各執其事以備宿衛禁庭有事則惟天子之所指使比之樞密各衛諸軍於是爲尤親信者也然四怯薛及自太祖以後累朝所御幹耳朶其宿衛未嘗廢是故一朝有一朝之怯薛總而計之其數滋多每歲所賜鈔幣動以億萬計國家大費每弊於此 十八年十二月議選侍衛軍萬人練集以備扈從

武宗至大元年正月樞密臣言先奉旨以中衛親軍隸皇太子位皇太子謂臣等曰世祖立五衛以應五方去一不可宜各翼選漢軍萬人別主一衛帝以爲然勅知院事錄木兒不花摘漢軍萬人別立衛 二年八月置太

子右衛率府命右丞相脫虎脫御史大夫不里牙敦領  
府事以河南蒙古軍萬人隸之王約曰左衛率府舊制  
有之今置右府何爲諸公深思之不可以累儲宮也太  
子又命取安西兵器給宿衛士約謂府事完澤曰詹事  
移文千里取兵器人必驚疑主上聞之奈何完澤曰實  
不慮及此

仁宗延祐四年冬十一月諭諸宿衛入直各居其次非有  
旨不得上殿闌入禁中坐罪大臣許從二人他官一人  
門者譏其出入五年二月勅廣寧開元等萬戶府軍  
入侍衛有兄弟子姪五人者三人留四人三人者二人  
留著爲籍

英宗至治三年二月命徽院選蒙古子弟四百入宿衛  
泰定帝泰定元年夏四月罷衛士四百人還宗仁衛 秋  
七月中書省臣言東宮衛士先朝止千人今增至萬七  
千請命詹事院汰去仍依舊制從之

文宗至順元年八月省院臺官奏定擬大內四宿衛每衛  
不過四百人累朝宿衛各不過二百人鷹坊萬四千二  
十四人當減四千人內饗九十九人及怯薛當留者各  
百人累朝舊邸官分饗人三千二百二十四人當留者  
一千一百二十人勝臣怯薛口共萬人當留者六千人  
其汰斥者歸本部着藉應役有容匿濫收者怯薛官與  
其長秋杖五十七沒家貲之半賞告者令監察御史常



察之制可

順帝至正十七年夏四月監察御史五十九言今京師周圍雖設二十四營軍卒疲弱素不訓練誠爲虛設倘有不測誠可寒心宜速選擇驍勇精銳衛護大駕鎮守京師實當今莫安根本固結人心之急務

皇明

太祖洪武甲辰設拱衛司領校尉隸都督府尋改拱衛指揮使司又以拱衛司類古衛尉寺改都尉司二年定爲親軍都尉府統中左右前後五衛軍士而儀衛司隸之十五年罷都尉府及司置錦衣衛親軍指揮使司鎮撫司理衛中刑名南鎮撫司兼管軍民後添設北鎮

撫司專理詔獄先是置儀鑒司至是改爲衛所隸有大  
漢將軍力士校尉人等專掌直駕侍衛巡捕等事若有  
重囚下本衛鎮撫司惟鞠二十年正月焚錦衣衛刑  
具先是天下官民有犯者俱命屬法司其有重罪逮  
至京者或令收繫錦衣衛審實情用事者因以非法  
凌虐上聞之怒命取其刑具悉焚之以所繫囚送  
刑部審理

按錦衣以任權制親軍二十一衛府軍等二十一衛以  
衆勢制錦衣合親軍二十二衛并武功永清彭城七陵  
衛與五府兵適相當爲彼此相維之局祖宗微權非人  
所能易識東廠之設二流並事鎮撫徑奏不由堂勘上

直巡綽親軍相無奉 旨逮繫必給刑科駕帖都察批  
文稽察所獲必下部議皆所以絕其專也比鎮撫非  
祖宗之舊乃置衛後之添設成化十四年鑄印比原設  
鎮撫司印增一之字十司者即十百戶所司五所各有  
十司此正設衛本意以其親之故重之故儀鑾上五司  
尤親而重之蓋其爲上殿司弓箭而下則已畧云洪武  
十五年自儀鑾司改置所隸有將軍力士校尉等役其  
職專掌直駕侍衛巡捕等事有重囚下本衛鎮撫司推  
鞠二十年以非法凌虐罪其官毀其刑具所繫囚改送  
刑部二十六年申明鞠刑之禁罪囚俱送法司永樂後  
任遇漸加而聲格因以爲異二鎮撫司專理刑名洪武

制不得用叅語送刑部擬罪發落則廷尉之評亦未嘗  
得而撓之也弘治十三年令法司將東廠錦衣衛送到  
囚犯從公審究有枉即與辯理不許拘定成案錦衣  
天子親軍不容不盛只其官置廢能開涉本兵使得持  
衡之體按緝捕爲陞授朝廷之有親軍稽不軌大事  
今錦衣所緝乃五城之選職以國初事勞甚簡天順後  
門達表斌朱堃等提督尚以十數爲率奏請一次正德  
間葉廣趙鑑東廠王岳鄭旺一時更代一年奏請四次  
陞賞後雖定歲終類一奏其勞則瑣矣

衛凡十八所錦衣中左右前後五所領軍士五所各分  
鑾輿擎蓋扇子旌節旛幢班劍斧鉞戈戟弓矢馴馬十

司分領將軍校尉上中上左上右上前上後中後親軍  
分領將軍力士軍匠馴象所領象奴養象衛掌侍衛之  
事恩功寄祿無常員恒以都指揮督領之凡將軍力士  
校尉分番護駕直宿巡察凡大朝常駕出入督設鹵  
簿儀仗凡皇城四門日夜番直巡邏之凡盜賊奸宄  
街塗溝渠密緝而時省之凡奉旨鞠獄錄囚勘事與  
三法司從事凡比試併鎗得監視鎮撫司掌衛刑名兼  
理軍匠添設鎮撫二人別印分司專理詔獄獄成直  
達上下法司覆擬經歷典出納文移吏百五十九人  
霍韜曰天下軍衛一體也錦衣等衛獨稱親軍備禁地  
也復使之無刑獄不亦甚乎夫天下刑獄付三法司足

矣錦衣衛復橫撓之越介冑之職侵刀筆之權甚非所以養氣節也昔光武崇高節名義之士滿東都以扶漢鼎宋祖敦廉耻刑法不加於衣冠忠義之徒爭死沒世今江西事變死者不過四人而已而猶不知所以養之可乎士夫有罪顧使官校當衆執之脫官裳以就鎖梏屈體貌以聽武夫朝列清班慕幽污獄則氣由此折盡矣雖或察其情而恕之使復披冠帶然武夫悍卒得以指之曰某也吾得辱之矣某也吾得辱之矣有志之士不甘自污此豪傑所以多山林之思變故所以少節槩之士也昔漢文帝以賈誼一言士夫遂不加刑戮會謂聖上盛德顧肯讓文帝乎自今乞令錦衣衛勿治刑獄

東廠勿預朝儀士夫有罪宜謫則謫宜廢則廢宜誅則誅宜贖則贖勿加笞箠勿加鎖梏以培養廉耻以激勵節義此於世教甚非小補蓋救人心振士風之至切者也

錦衣等衛隸府衛守中等衛各有指揮使同知僉事衛鎮撫正千戶副千戶所鎮撫百戶試百戶無常員經歷各一人所或有吏目一人

錦衣衛掌侍衛之事恩功寄祿無常員惟以都指揮都督領凡守衛親軍衛畫前左右後四行日夜巡邏之皆有團伍定其籍之多寡而第其番之上下凡衛直有數戚武官勲衛散騎舍人將軍力士校尉

侍衛官兵事例

掌領侍衛侯伯駙馬等官六員一員管錦衣衛大漢將軍  
及勳衛散騎舍人府軍前衛帶刀官四員管三千營紅  
盔將軍每日輪直一員管五軍營又刀官軍錦衣衛大  
漢將軍一千五百七員名府軍前衛帶刀官四十員  
三千營紅盔將軍一千五百員名把總指揮十六員  
明甲將軍五百二員名把總指揮四員大漢將軍八員  
五軍營又刀圍子手三千名把總指揮八員勳衛  
散騎舍人無定員旗手等二十衛帶刀官一百八十  
員

凡各門守衛官員照依分定皇城四門等處地方各



領銅符收掌守衛遇巡城官到來將銅符比驗相同方許點開 成化十二年奏准每日 長安左右門初開先放常朝及見辭等項官吏盡絕方許驗牌放進各監局工役人等有攙越混進及夾帶財物入內買賣者守衛官具奏治罪 弘治三年題准大漢將軍并金吾等二十衛守衛等官各督所屬軍士凡遇北虜小王子并瓦剌使臣 朝見辭謝進入之時各要部伍齊肅甲仗鮮整不許誼譁錯亂違者叅問 十四年人各門進納錢糧所在守門軍士及門吏邀索財物者聽點城及巡視科道官叅提問罪 正德四年題准朝叅官員跟隨人役照例大臣三人餘者一人其供應人等務候朝畢

驗進若故遺并數外多帶及先期闖入者守衛官軍即時阻退如軍有躲閒代替官有賣放私占辦納網巾菜蔬等項俱聽巡視糾儀科道等官叅奏重治

世宗嘉靖二十九年庚戌夏六月虜大舉入通州管佳以其枝兵遊騎薄京城遂肆大掠京師戒嚴無敢議開門出擊上令兵書丁汝璈理圍營兵不下五六萬其中又多老弱遊惰不堪者遣將分領屯城內外時京兵久不見敵驅之出皆涕泣不敢前諸將亦未臨行陣俱色變已而召汝璈擊虜汝璈不奉詔蓋無兵也汝璈尋棄市又移檄各邊將勤王邊兵至城中倉率儲餉皆未有措有旨犒師其牛酒諸費皆不知所出移文戶部

往來數日始得數餅餌之又命發粟則囊橐金飢皆  
無需當事者惟有大息

郡國兵 鄉兵

宋

寧宗嘉定七年六月置嘉定府邊丁二千人以備蠻命置  
安撫諸司給其費於是籍土丁之壯健者二千人月廩  
之俾守諸寨蠻人聞知邊頭有備悍之自是不敢輕出  
抄掠九年正月命諸州招填軍籍十二月遷天水軍  
于舊縣置知軍以下官十七年五月詔覈實兩淮京  
湖四川江上諸軍之數

理宗紹定初趙善湘知建康荆防江軍寧淮軍端平初

知南劍州劍浦弓兵營 是年十二月詔衛州  
置雄楚軍五百人 四年三月孟珙復襄陽以蔡息降  
人置忠衛軍襄郢降人置先鋒軍 淳祐十二年二月  
置池州遊擊軍 時知漢陽黃幹奏言國家比年以來  
講求邊備最爲詳密然竊以爲外侮固所當慮而內患  
尤所當憂今之內患莫甚于人心渙散而無統嘗觀成  
周比閭族黨州鄉之法上下相維脈絡相關提防密而  
姦宄不生法制嚴而馴服有素夫是以人心有所統攝  
而緩急不敢自肆後世保伍之法猶有成周之遺意然  
州縣之間未嘗舉行不過保正掌追胥戶長掌租稅而  
已以一家而總數十里之地以一身而任數百家之責

又每一年而輒易此豈足以總攝人心使之久安而無變哉臣嘗爲臨川令當開禧用兵之後隅官之法未盡廢其法以五家爲一小甲五小甲爲一大甲四大甲爲一團長一里之內總數團長爲一里正一鄉之內總數里正爲一鄉官一縣之地分爲四隅每隅之內總數鄉官爲一隅官以察姦慝以護鄉井行之三年人以爲便今者蒙恩假守漢陽適值大旱細民艱食修舉荒政遂推行保伍之法戶籍多寡蓄積有無皆可得而周知然亦但爲荒政舉耳不敢大有所更張也向使熟議而力行之則維持人心防閑變故之道無以易此况湖右之地五方雜處之民土地廣柔姦盜伏藏往年虜未入

境嘯呼成群剽劫閭里者皆此曹也使保伍之法旣明則人心素有統屬亦何至于肆行而莫之禁耶故知保伍之法所以總攝人心防閑變故而爲緩急之慮也苟法制素守人心旣孚因其農隙教以武事則伍兩卒旅軍師之制可以漸復而戰攻守禦之習亦無不精不惟不使至于爲寇而又足以禦寇亦何憚而不爲乎臣所陳果有可採欲乞行下制置司詳議施行

河北河東強壯 理宗端平元年十二月知郴州林汝浹奏兩河郡兵最少臣守英德目擊其弊不敢招填今河嚴督州郡招刺強壯勿爲文具庶使各有武備

荆湖義軍土丁弩手 不見叛置之始北路辰澧二州

南路全邛道末四州皆置蓋溪峒諸蠻種類滋熾保撫  
岩險或叛或服控制陬落須其土人故置是軍皆選自  
戶籍蠲免徭賦番戍寨柵大率安其土風則罕嬰瘴毒  
知其區落則可制狡獪其校長則有都指揮使副都指  
揮使指揮使副指揮使都頭副都頭軍頭頭首採斫招  
安頭首十將節級皆叙功遷使相綜領施之西南宴代  
王師有禦侮之備而無饋餉之勞其後荆南歸峽鼎郴  
衡桂陽亦置慶曆二年北路總萬九千四百人南路總  
五千一百五十八人番戍諸寨或以歲或以季或以月  
上番人給口糧有功遷補其都副使指揮使歲給錦袍  
月給食錢指揮使副指揮使給紫大綾錦袍都頭以上

率有廩給熙寧初籍其數凡一萬五千人六年諸路行保甲司農寺請令全邵二州土丁弩手共爲保甲立保正保長以統之元祐七年湖南路鈐轄謝麟請以邵陽武岡新化等縣中等以下戶選充土丁弩手與免科役七年一替排補等級不拘資放年分作兩番邊寨防括不得募人如有私役依私役禁軍勅諭從之致和七年募湖北辰沅澧州土丁爲刀弩手授以閒山散居邊境教以武藝其隸于籍者至九千餘人靖康初全軍調發前徃江東援太原陷於虜存者僅千五百人建炎二年罷之紹興六年命招募以三千五百人爲額淳熙三年勅募人教閱犒賜如禁軍例然刀弩手舊田諸郡已收



爲省計有司雖募人爲之徃徃無田可給但虛立姓名以應命又土人多憚點集甚患苦之李燾張栻力言其不便栻請用見數委提刑躬行點檢侯有田設官始令招足原額燾復言如此則提舉刀弩一司又當復置而欲冒實者必至橫沒民田爲害滋大不若以見點數爲準專委守臣寬以歲月命招及數從之湖南鄉兵舊制領以鄉豪有彈壓緝捕等名大者統數百家小者亦二三百家由潭連道英韶郴桂皆置京西路騎軍之額自騎射而下六步軍之額自奉化而下二十有五並改號曰勁武凡爲四十五指揮總一萬五千一百五十人荆湖路騎軍之額自騎射而下三步軍之額自左衛而下

二十並改號曰宣節凡爲四十四指揮總一萬二千三百人

萬弩手 紹興元年沅州奏熙寧末始創營田鼎澧辰沅靖置弓弩四千人靖康調發不存乞以閑田募民承佃招弓弩手二千人從之

邕州溪峒壯丁 淳祐間李魯伯言備邊於廣右者數年以來講明條畫一則曰戡約溪峒二則曰團結民丁監司帥守之建明樞密行府之經畫與夫游談奏議率以此爲先務今者檢照前牘所謂輯約溪峒則類是損濡沫之禮物給借補之資帖取名作帳狀曰已今措置關險糾集保守其實相與羈縻而已稍有實作區畫即

生猜疑如融之大步嶺宜之隴柵寨屋屢立蠻徭即焚  
前帥董槐侍郎固嘗見於申請亦以惹事端爲慮今官  
司戢約使之不爲我梗諭令自保鄉井姑爲籬落則亦  
可稍恃之固吾圉也所謂團結民丁則沿邊民丁之在  
僻地者有限居溪峒者爲多先儒所謂養兵數百而獲  
十萬民兵之用皆峒丁也徃時邊州紀綱修明號令信  
服乃得以疆理之雖其說如此蓋亦未嘗用之也况今  
時異而事不同乎前帥蔡範侍郎嘗申陳民兵利害亦  
慮邊民鄰境易致疑愕論述甚詳今官司團結其間散  
在徭峒號召之旣難使之自備器糧資費豈易必盡得  
其首領之心然後可賴其壯丁之力此姑用之以壯聲

勢則可亦未可全恃之爲吾用也臣匪材被命此來所部尺籍既虛於此二者亟討論措置乃職分所當先豈敢不加之意近畧檢照邕宜融三州二三年間案牘之所載溪峒之在邕州則樞密行府嘗差邕倅黃恣龍者團結右江唐興歸樂等州十八隘又新置古絢首領黃賢能等一十九隘宜州則守臣曹暉亦嘗結約天地蘭邠等州峒首領羅光具等一十二處融州則差曾有開結約所部諸款以路萬里爲諸款首或遺以銀牌鹽錦或假以資帖名目或與之結立盟誓諭以無事則守險隘有警則協力勦逐此近年溪峒之見於已行者也民丁之在邕州則已具之前項左右江之所陳不暇遠攷

近自淳祐八年經司嘗行下團結兩江諸州峒丁壯右江則黃慶龍具到名帳共計一萬九百六十二人左江則廖一飛具到名帳共計二萬二千六百人其本州民丁在外如宜融兩州則淳祐五年亦有團結舊籍在宜州則有丁民丁保丁義效撞丁共九千餘人其義撞一項可用在融州則有土丁峒丁大款丁保丁共九千餘人其款丁一項可用淳祐八年本司亦嘗行下團結却未見申到大率出於省地者以家業充丁或老弱或冗雜未免備數出於溪峒者多習於戰間如藥箭如標槍皆其所長此近年民丁見於已行者也臣抵此雖未久朝夕考求始末即欲申嚴行下屬以宣宜兩郡守皆將

更易難以責之措置融守謝國南近邦中本司欲乘此  
農隙教練民丁已即從其所請勉之究意矣第臣私竊  
過計近自蜀西少緩窺圖之報便覺嶺右空寬備禦之  
憂前項結溪峒民丁總一有所施爲未免即生疑愕  
前者朝廷行下閩臣奉命經理上下知所遵承今臣雖  
爲此來元未準朝廷指揮邊防戒飭一字臣若安於循  
習則失於先事而慮之防若亟於講行則恐有無事自  
擾之誚蠻徭環境動生猜疑舉動稍輕大係觀聽茲不  
容不謹如此臣欲具行下三郡各照已申經司之舊籍  
若溪峒則諭令首領遵守成規布恩信以示撫綏葺險  
隘以作隄備民丁則因其名帳常加覈實以彊壯而補

老弱因閒暇以加訓練庶幾近年之所已行不至既久而付文具俟其逐州申到或有合作更革措置又當隨時區處若州郡事力不及經漕兩司都當與之通融助給施行欲望朝廷劄下邕宜融三郡守臣遵守

義士 沈作賓知平江府請得節制許浦水軍部可有使臣故海盜也使招誘其黨寇勉之又置義士壯士衣糧視官軍而輕捷善鬪過之于是海道不警市井無譁民兵 嘉定間趙范知揚州務修軍政籍民爲民兵春夏在田秋冬教閱官免建砦而私不廢農 理宗端平二年肇慶府陳雷奮入對奏廣東民兵首領事上曰廣東民兵之制如何雷奏止爲保衛鄉井無調發之援

陝西亦十五萬而卒以此制西北二虜未聞事勢急遽之時而不可以行團結之策也今者坐視所在兵少力分之弊不亟起而圖之鞫虜之來勢若風雨乃欲以踈漏單薄之備當飄忽剽悍之敵一處失守則諸處盡瓦解矣臣之愚計謂宜作急行下應沿邊州郡日下舉行團結民兵之政其間或有規模已成者更須精加整葺務令鎮密如其未曾結集去處宜及今嚴行要束亟作措置處處有保甲人人知固守無朽虛踈薄之患有周圉捍禦之功此實當今至大至急之務也朝廷每舉一事未嘗不曰專委監司郡守其所以鼓舞監司郡守者未嘗不曰有賞罰柰之何能言而不能行歟當勢之急



也則曰倉卒何暇爲及羽檄稍稀虜騎稍退又諉之於無事矣如此則是終無可爲之時也今者團結民兵事願陛下宣諭宰執務在速行如救焚拯溺不容少緩仍責在監司郡守以能否爲賞罰郡守不勝任則監司按劾監司不稱職則臺諫評彈毋事空言專行實政則備審而膽壯又何艱虜衝突之足慮哉

保勝軍 理宗淳祐四年七月詔江淮失業強壯之人置武勝五千人從淮西安撫副使王鑑請也

山水寨 孝宗隆興元年臣僚言乞行下都督府專委兩淮守臣各括賣山水寨首領姓名保明來上量補官資專一哀集鄉兵俾之團結明立賞格一有緩急入城

守禦荆襄邊郡亦乞行下制置司依此施行詔江淮都督府湖北東西制置司措置二年十二月十日勅楚淝濠廬光州盱眙光化軍管內并楊成西和襄陽德安府信陽高郵軍應州縣山水寨首領自備錢糧糾集把隘或戰鬪立功仰逐州軍守臣保明申省取旨推恩理宗淳祐三年六月資政殿學士知溫州趙與懽乞廢併諸寨增置鎮海寨兵以備倉猝從之時李明復奏曰寨之有家計向者吳玠實創之岷曰仇池鳳曰秋防原階曰楊家崖成曰董家山是四者皆有險可恃有泉可飲又爲之糧以食爲之屋以居無事則寓于州有事則歸于寨其爲慮蓋甚悉也自紹興至開禧虜嘗侵犯矣

視之而不敢攻以有險在前也逼之而不敢越懼吾之襲其後也古人設險守國殆不過此曠變以後邊帥欲築城以爲守而家計寨之實遂廢曩時蜀帥又欲列柵以爲固而山寨之役遂與夫謂之山寨與前所謂家計寨若類矣而實非也蓋家計寨凡四擇地利之絕險者爲之而山寨則爲數七十無其險也家計寨之設乃官與民相保聚其力足以捍敵而山寨則家自爲活無其力也彩畫成圖但詭觀羨多張虛勢無補實用是驅之使就死地也以山寨之受禍也而併與其足以避禍者廢而不葺亦未之思耳臣謂家計寨宜復其舊者此也義勇 紹興中鄂州七縣主客戶六萬六千二十二口

三十一萬四千八百九十四而民兵之籍總爲萬五千二百有一人岳州義勇之籍四千四百九十九人四邑保伍九百三十五甲計二萬八千五百九十三人大抵荆鄂岳三郡率五家供一兵焉三十一年虜亮寇江詔淮漢等郡籍民爲兵時荆南守曹威乃請籍民爲義勇其法取于主力之雙丁每十戶爲甲五甲爲團甲皆有長擇邑豪爲總首歲於農隙教以武藝糧從官給初軋道間舉荆南七州之籍主客佃戶凡四萬二千餘戶計十萬餘丁除當差役人外得義勇八千四百九十人四年荆湖安撫王炎言荆湖義勇團結教集使之自備食用必不能辦乞截留本所苗米萬四千石并漕司應副

錢二萬緡仍從都統司假甲三千弓矢旗幟官爲造給  
有旨從之六年二月辛亥帥司劉珙言荆南湖北兩路  
民兵訪聞諸郡起籍民兵有上三等戶取義勇一人亦  
有四等五等戶取一人產多者可以支吾少者徃徃棄  
產逃走乞充義勇者並免科役及身丁口四等戶仍差  
免保正長伍等戶又免三分稅役每七十五人爲一隊  
遇教閱日以管屯田之穀供其費奏可仍以甲萬副與  
之是年九月權知荊門馮忠嘉奏本軍所教義勇三千  
五百四十八人教閱各有一月乞添展教之三月詔令  
劉珙相度申奏七年正月馮忠嘉又教閱本州義勇因  
舊籍增補三百人又籍戶馬得四百匹分爲六隊孝宗

大喜詔總領所歲以馬料千石給之仍擢忠嘉直秘閣  
淳熙初張栻爲帥遵修劉珙之法義勇增多至萬五百  
人分爲五軍軍分五部栻旣去教法寢弛十一年冬趙  
雄爲帥舉行其政增三百人通舊爲萬三千八百人大  
抵湖北諸郡皆有義勇信陽有義勇又有義士惟澧州  
石門慈利不置藉紹興末守臣亦藉之章穎帥湖北時  
又乞義勇之應差保正者以家業錢多寡爲限限外之  
數與官戶輪差從之理宗端平二年八月新知建昌  
軍徐杲辭奏江淮海道利害上曰淮兵不爲不多杲奏  
義勇忠義雖多正兵甚少上曰義勇亦自可用杲奏皆  
沿淮戀土之民人人可用

忠勇 理宗紹定四年七月詔制總諸帥戎司凡忠勇  
死義之家並與優給其有子才藝異衆者令赴樞密院  
審視錄用之 時李鳴復奏曰軍之有忠勇初以陝西  
弓箭手刺爲之興洋曰義士金州曰保勝京西曰保捷  
而關中則謂之忠勇是兵也可以攻可以戰而尤利於  
守蓋有墳墓屋廬以繫其志有妻子骨肉以堅其心其  
勢當效死弗去也關外之賦總不過四十萬若盡蠲以  
爲軍一人執役數人荷戈隨之籍一萬人可得數萬人  
用古者寓兵於農何以異此韓寇之入制司懼其勢之  
難以支也徧給旗榜以招忠義事定之後又知忠義之  
不容散遣也創置軍籍以行也田夫謂之忠義與前所

謂忠勇若一矣而實殊也蓋忠勇軍自給衣糧器械而忠義則給之於官者也忠勇軍有常廩故有常心而忠義則皆烏合者也責以屯田未必能執事核其實數未必果皆按籍此蓋不能無弊也創增官券以養忠義而其不費官券者乃寢而不行亦幾倒置矣臣謂忠勇軍常增其額者此也家計寒復則保聚有要地而人心安忠勇軍增則備禦有勁兵而人心固臣之所論非特爲五州計爲西蜀計也陛下如以臣言爲可採乞下四川制置司參酌施行

忠義 嘉定八年命利州路安撫司招刺忠義人 十一年命四川制置司招集忠義人忠義人立功其賞視



官軍司令許應龍奏曰夫紓一時之急者不得不爲權  
宜之舉防後日之患者不可不爲強本之計賴忠義之  
人以紓一時之急豈非權宜之舉乎練官軍以防後日  
之患豈非強本之計乎粵自京口之舟失於警備之不  
嚴泗水之師衄於揣度之不審旣而決淮陰之勝以挫  
殘虜之鋒者忠義之力也邇者烽燧告警而敵情叵測  
遊騎出沒而疆場靡寧未幾秦濠梁之捷以伸吾中國  
之威者又忠義之力也雖然比特權宜之舉而彊本之  
計又有不容緩者蓋元氣旣固外邪自消吾之威令苟  
伸則英雄豪傑之徒莫不俛首屈意於其下然則官軍  
者豈非今日之所當振乎官軍振則根本強根本強則

忠義之人可以爲吾之助而不能爲吾之患 亦漢以  
南北軍相制之遺意苟以其脆弱難用不加激勵而擯  
却之功一切倚辦於忠義彼將謂秦無人萬一恃強而  
驕蹇挾功而邀求不厭其欲其能帖然而無譁乎况吾  
之虛實彼所熟知苟一搥足何以制之且今之官兵非  
不多也器甲非不利也廩食非不繼也以此禦戎何患  
不濟苟能揀其驍銳嚴其紀律日夕淬礪常若寇至迨  
遇敵之際則功多者有厚賞不進者有顯戮毋徇私意  
而爲之重輕毋事姑息而爲之容隱則怯者奮而爲勇  
弱者轉而爲強兵威振勵隱然有猛虎在山之勢不惟  
可以折敵人之衝尤可以消山東偏重之勢何者彼知

朝廷之所倚仗者不專在我也夫既資彼之力以紓一時之急復彰吾軍以消他日之患則國勢歸然猶泰山而四維之矣而或者乃曰忠義之人猶養虎耳饑則求食飽則反噬深咎夫招來者之不審也吁是固然矣然旣招之則不容却之彼旣與虜爲仇群然歸我苟無以安其心是絕其向生之塗激其等死之忿獸窮則搏勢所必至况彼方有功於我猶賴以爲犄角之助則亦惟區區調伏使之有致遠之能而無泛駕之虞耳所謂區處之策者何也懷之以恩結之以信寵之以爵賞膽之以缺額官兵之廩使之歡忻感戴樂爲吾用而吾之兵威又足以鎮服其心則亦庶乎其可也吁忠義若可慮

也而有以制之則不足慮官軍若難用也而有以勵之則皆可用然而致此者則必有任其責者耳夫膺守禦之寄者邊將也總邊將之權者制閫也昔蜀以孔明駐漢中吳以陸遜守荊渚皆付以事權不從中御故得以乘機制變而有成功今之任制閫者苟得其人則舉邊陲之寄悉以付之使進退伸縮莫不如意則號令一而人心協苟州縣之有事權者或得以已見專達雖曰事機無壅然而謀議或有異同施行或至牴牾則倉卒緩急諸將罔攸稟令廟謨宏深其必有以處此矣

鎮淮 淳祐十年十月詔淮西疆場延袤八百餘里近令沿江制司團結耕屯漸已就緒但制閫置司江南相

去差遠可令淮西提舉李子選就司空山創司提舉本路山寨

忠衛軍 景定初孫子秀以浙西提刑兼知常州淮兵數百人浮寓貢院給賞不時死者相繼子秀請于朝創名忠衛軍置寨以居截撥上供贍之

遼

遼有大首領部族軍親王大臣體國如家征伐之際往往置私甲以從王事大者千餘騎小者數百人著藉皇府國有戎政量出三五千騎留餘兵爲部族根本

太子軍 偉王軍 永康王軍 子越王軍

麻荅軍 五押軍

衆部族軍分隸南北府守衛四邊各有司存

北府凡二十八部

侍從官帳曰奚王府部鎮南境曰五院部六院部東北  
路招討司曰烏隗部東北路統軍司曰遙里部伯德部  
與里部南尅部北尅部圖廬部木者遠魯虢部河西部  
西北路招討司曰突呂不部與衍女直部室韋部西  
路招討司曰溫刺部烏古刺部涅刺越兀部梅古悉部  
額的部匿訖唐古部鶴刺唐古部黃龍府都部署司曰  
隗衍突厥部與衍突厥部北唐古部五國部 古敵  
烈統軍司曰迭魯敵烈 戎隗烏古部曰北敵烈部南  
府凡一十六部曰鎮驛西南境曰乙室部西南路招討

司曰品部迭達迭刺部品達魯驪部乙典女直部 西  
北路招討司曰楮特部東北路統軍司曰達馬鼻古德  
部東北路女真兵馬司曰乙室與隄部東京都部署司  
曰楮特與隄部窋爪部稍瓦部局木部戊倒塔嶺曰訖  
僕拈部屯駐本境曰撒里葛部南唐古部薛特部

### 五京鄉兵

上京臨潢府統轄有丁一十六萬七千二百 東京遼  
陽府統轄有丁四萬一千四百 南京 律府統轄有  
丁五十六萬六千 西京大同府統轄有丁三十二萬  
六千七百 中京大定府統轄丁籍莫考可見者高  
三韓縣丁一萬 已上五京民丁可見者一百一十萬

七千三百

邊境戍兵

東京至鴨綠西北峰爲界黃龍府正兵五千咸州正兵一千 東京沿女直界至鴨綠江軍堡凡七十各守軍二十人計正兵一千四百 來遠城宣義軍營八太子營正兵三百大營正兵六百蒲州營正兵二百 營正兵五百加陀營正兵三百王海城正兵三百柳白營正兵四百沃野營正兵一千 神虎軍城正兵一萬 右一府一州二城七十堡八營計正兵二萬二千此東境戍兵所以備高麗女直等國也

金



太祖收國元年五月詔遼東京州縣及南路降者置猛安謀克一如本朝之制

海陵貞元中遷都于汴徙上京路右諫議烏里補猛安太師勗宗正宗敬之族處之中都幹論和尚胡剌三國公太保鼎詹事烏里野輔國勃魯骨定遠許烈故呆國公勃迭八猛安處之山東阿魯之族處之北京按達族屬處之河間旋命兵部尚書蕭仲恭等與舊軍皆分隸諸總管府節度使授田牛使之耕食以番衛京國

世宗大定十五年十月遣吏部郎中蒲察九虎等十八分行天下再定猛安謀克戶每謀克戶不過三百七謀克至十謀克置一猛安二十年以祖宗平定天下以來

所建立猛安謀克因循既久其間有戶口繁簡地里遠近不同又自正隆之後差役無度乃大定間亦有功多未酬者遂更定以詔天下復命新授者並令之封其謀克人內有六品以下職及諸局承應人皆爲遷之三從以上族人願從行者猛安不得過十戶謀克不得過六戶二十一年三月詔遣大興尹完顏迪古速遷河北東路兩猛安上曰朕始令移此欲令與女直戶相錯安置久則自相姻親不生異意此長久之利也今者移馬河猛安相錯以居甚符朕意而遙落河猛安不如此可再造兵部尚書張那也按視其地以雜居之二十二年以山東屯田戶鄰于邊鄙命聚之一處俾協力蠶種

右丞相烏古論元忠曰彼方之人以所得之地爲家雖兄弟不同處故貧者衆衆政粘葛幹特刺曰舊時兄弟雖析猶相聚種今則不然宜令約束之又以猛安謀克舊籍不明遇簽軍與諸差役及賑濟增減不以實命括其口以實籍之二十四年以上京率胡刺溫之地廣而腴造刑部尚書烏里也出府庫錢以濟行賈牛畜迂速頻一猛安胡里改二猛安二十四謀克以實之蓋欲上京兵多他日可備緩急之用也 承安元年六月詔應禁軍器路分步弓手擬于射糧軍內選之馬弓手擬于猛安謀克軍戶餘丁內選之其有爲百姓害從本州縣斷遣無猛安戶于二百里內屯駐軍餘丁內取之依

予步手月給二貫石 是時宗室戶百七十猛安二百  
二謀克千八百七十八戶六十一萬五千六百二十四  
東北路部族紇軍曰迭刺部曰唐古部二部五紇戶五  
千五百八十五其他若助魯部族烏魯古部族石壘部  
族萌骨部族計魯部族字勃本部族數皆稱自西北西  
南二路之紇軍曰蘇謨典紇曰耶刺都紇曰骨典紇曰  
唐古紇曰霞馬紇曰木興紇曰萌骨紇曰咩紇曰胡都  
紇凡九其諸路曰曷懶曰蒲與曰婆速曰恤頰曰胡里  
改曰移懶移懶後廢皆在上京之鄙或置總管府或置  
節度使領之

宣宗貞祐二年河東北路按察使王擴陳中興策大約謂

軍校猥多分例過優萬戶一員其俸可給兵士三十人  
本路三從宜萬戶二百餘員十羊九牧類例可知乞以  
千人爲一軍擇里重一人萬戶兩猛安四謀克足以教  
閱約束矣豈不簡易而省廢哉書奏不見省

渤海軍 渤海八猛安之軍也

奚軍 奚人遙輦昭古牙九猛安之兵也奚軍初徙于  
山西分遷河東

漢軍 大定時所置有事則簽取于民無事或亦放免  
中都永固軍 大定時所置

鎮防軍 諸軍中取以戍代戍邊者

西北分番屯戍軍

西北未屯軍 初太祖收國二年四月詔以婁室言黃龍府地僻且遠宜重戍守乃命合諸路謀克以婁室爲萬戶領之世宗大定五年正月詔泰州臨潢接境設邊堡七十駐兵萬三千命元帥府諸新舊軍以六萬人留戍餘並放還章宗承安三年八月命護衛右和尚爲押軍萬戶率親軍八百人武衛軍千六百人戍西北路西北路驅軍 金初所免遼人之奴婢使屯守泰州者邊鋪軍 守河南陝西邊界者

三虞侯順德軍 守河東邊界者

諸路効節軍 章宗所置掌司弓手者

河南陝西弩手軍 宣宗興定二年選募二千人爲一

軍賜號威勇

諸路射糧軍 募民爲之五年一籍三十以下十七以上強壯者皆刺其中以兼充雜役者

牢城軍 嘗爲竊盜者以充防築之役

土兵 司警捕之事

長勝軍 天會間郭藥師所統而降者皆遼水側人也  
以鄉土歸金皆愁怨思歸宗望令罷還正隆間又嘗罷  
諸路漢軍而所存者猶有威勇威烈威捷順德及韓常  
之軍之號

義軍 貞祐二年古里甲石倫同知太原府事奏請招  
集義軍設置長校各立等差都統授正七品職副統正

八品萬戶正九品千戶正班任使謀克雜班仍三十人爲一謀克五謀克爲一千戶四千戶爲一萬戶四萬戶爲一副統兩副統爲一都統外設一總領提控制可

邊境置兵之州三十八鳳翔延安鄧鞏熙州潁蔡隴秦河海壽唐商洮蘭會積石鎮戎保安綏德保德環葭渼寧邊東勝淨慶來遠桓昌昌懶婆速蒲與恤品胡里改置于要州者十一南京東京益都京兆太原臨洮臨潢置泰撫蓋及宣宗南遷亂軍潰去兵勢益弱遂盡擁猛安戶之老稚渡河僑置諸總管府以統之器械旣缺糧備不給腴民膏血而不足乃行括糧之法一人從征舉家待哺又謂無以堅戰士之心乃令其家盡入京師不



數年至無以爲食乃聽其出而國亦屈矣然初南渡時盡以河朔戰兵三十萬分隸河南行樞密及帥府徃徃蔽匿強壯驅羸弱使戰不能取勝後乃至以二十五人爲一謀克又設猛安每謀克除旗鼓司火頭五人任戰者止十八人不足成隊伍但務存其名而已故劉祁謂金之兵制最弊每有征伐及邊釁輒下令簽軍使遠近騷動民家丁男或皆強壯盡取無遺號泣動乎閭里嗟怨盈于道路

大將府治稱號 收國元年置咸州軍帥司以經畧遼地置南路都統司以討張覺 天輔五年襲遼主始有內外諸軍都統之名又置奚路都統司以御奚後改爲

六部路都統司每司統五六萬人又以渤海軍爲八猛安猛安上軍帥軍帥上萬戶萬戶上都統然時亦稱軍帥爲猛安而猛安則稱親管猛安者及燕山旣下循遼制立樞密院于廣寧府以總漢軍 太宗天會元年以襲遼主所立西南都統府爲西南西北兩路都統府三年以伐宋更爲元帥府其都元帥必以諸班宰極烈爲之恒居守不出六年詔還二帥以鎮方面諸路各設兵馬都總管府州鎮置節度使沿邊州置防禦使凡州府所募射糧軍牢城軍每五百人爲一指揮司使分爲四都都設左右什將及承局押官其軍數有多寡則與近者合置不可合者以三百人或二百人亦設指揮使若

百人則止設軍使百人以上立爲都不及百人止設什將及承局管押官各一員十年改南京路都統司爲東南路都統司治東京以鎮高麗後又置統軍司于大名府海陵天德二年改諸京兵馬都部署司爲本路都總管府罷大名統軍司而置統軍司于山西河南陝西三路以元帥府都監監軍分統天下之兵又改烏古迺烈部統軍司爲招討司以婆速路統軍司爲總管府三年以元帥府爲樞密院罷萬戶之官正隆末復陞陝西統軍司爲都統府世宗大定五年復罷府降爲統軍司尋又設兩招討司與前凡三以鎮陞東北路者初置烏古迺烈部後置于泰州泰和間以去邊尚三百里乃

命分司于金山西北路者置于應州西南路者置于桓州樞密院每行兵則更爲元帥府罷則復爲院 宣宗南遷河北封九公因其兵假以便宜從事沿河諸城置行樞密院元帥府大者有便宜之號小者有從宜之名元光間招義軍總以都統又外設總領提控故時皆稱元帥爲總領

### 養兵之法

熙宗天眷三年詔歲給遼東戍卒紬絹有差 海陵正隆四年命河南陝西統軍司并虞候司順德軍官並增廩給六年將南征以絹萬匹于京城易衣襖穿膝數以給軍 世宗大定三年南征軍士每歲當支一千萬貫官

府止有二百萬貫外可取于官民戶此軍須錢由始也  
時言者以河南山東陝西等路循宋齊舊例州縣司吏  
弓手于民間驗物力均敷顧錢名曰免役請以是錢贍  
軍省其數以聞詔罷弓手錢其司吏錢仍舊四年六月  
奏元帥府乞降軍須錢上曰帥府支費無度科取于民  
甚非朕意仰會計軍須支用不盡之數及諸路轉運司  
見在如實缺用則具數以聞十年四月命德順州建營  
屋以處屯軍十七年七月以羊皮三萬賜西北路戍兵  
章宗承安三年以軍須所費甚大乞驗天下物力均  
徵擬徙黃河夫錢例徵軍須錢驗各路勢家物力每貫  
徵錢四貫西京北京遼東路每貫徵錢二貫臨潢全州

則免徵周歲三限送納恐期遠遂定制半年三限輸  
納凡河南陝西山東倣老千戶謀克蒲輦正軍阿里  
喜等給賞之例舊制千戶十年以上賞銀五十兩絹三  
十疋不及十年比例十年以上謀克支謀克十年以上  
銀四十兩絹二十五疋不及十年銀三十兩絹二十匹  
蒲輦十年以上銀三十兩絹二十疋不及十年銀二十  
兩絹一十五疋馬步正軍錢一貫五百文米四斗一  
馬芻粟阿里喜隨色人錢一貫米四斗一馬芻粟德  
順軍指揮使錢六貫米二石八斗絹六疋三馬芻粟軍  
使什將錢四貫米一石七斗絹五疋給兩馬料長行錢  
二貫米一石五斗絹四疋綿十五兩給一馬料奚軍

謀克錢一貫五百文米一石五斗紬絹春秋各一疋給  
三馬料蒲輦錢一貫米二石七斗紬絹同上給二馬料  
長行錢一貫米一石八斗紬絹同上飼一馬 北軍臨  
潢等處永屯駐軍千戶錢八貫米五石二斗絹八疋飼  
馬六匹步軍飼兩馬地五頃謀克錢六貫米二石八斗  
絹六疋飼五馬地四頃蒲輦錢四貫米一石七斗絹五  
疋飼四馬地三頃正軍錢二貫米一石四斗五升絹三  
疋綿十兩地一頃旗鼓司人與阿里喜同交替軍錢二  
貫米四石阿里喜錢一貫五百文米四斗上番漢軍千  
戶月給錢三貫糧四石絹八疋飼四馬謀克錢二貫五  
百文糧一石絹六疋飼二馬正軍錢二貫米九斗五升

絹四疋 上京路永屯駐軍所千戶月給錢粟十五貫  
石絹十疋綿二十兩飼三馬謀克錢六貫米二石八斗  
絹六疋飼二馬正軍月支錢二貫五百文米一石一斗  
絹四疋綿十五兩飼一馬阿里喜隨色人錢二貫米一  
石一斗絹四疋綿十五兩 諸北邊永駐軍月給補員  
馬錢四百文隨色人三百文 貞祐三年軍前委差及  
掌軍官規圖糧料冒占職役皆無實員又見職及遙授  
者已有俸給又與無職事者同支券糧故時議欲省員  
減所給之數俟征行則全給之及興定二年彰化軍節  
度使張行信言一軍文役舉家廩給蓋欲感悅士心使  
爲國盡力耳至于無事之時其妻女猶受給何謂耶五



耳京南行三司官石抹幹魯言京南東西三路見屯軍戶老幼四十萬口歲費糧百四十餘萬石皆坐食官租甚非善計皆不見聽 諸屯田軍人如差防送日給錢一百五十文 看管孝寧宮人月給米五斗柴一車春秋衣纈布一段秋絹二疋綿一十五兩 諸黃院子年滿者以元請錢糧三分內給一貫石養老

按史臣曰金興用兵如神戰勝攻取無敵當世曾未十年遂定大業原其成功之速俗本驚勁人多沉雄兄弟子姪才皆良將部伍保落技多銳兵加之地狹產薄無事苦耕可給衣食有事苦戰可致俘獲勞其筋骨以耐寒暑徵發調遣事同一家是故將勇而志一兵精而力

齊一旦奮起變弱爲強以寡制衆用是道也及得志中國自顧其宗族國人尚少乃創土地崇位號以假漢人使爲効力而守猛安謀克雜刺漢地聽與契丹漢人婚姻以相固結迨夫國勢旣盛則歸土地削位號罷遼東渤海漢人之襲猛安謀克者漸以兵柄歸其內族然樞密簽軍募軍兼採漢制伐宋之役參用漢人及諸部族而統以國人非不知制勝長策在于志一之將用力齊之兵也第以土宇旣廣豈得盡任其所親哉馴致極盛乃自患其宗族國人之多積其猜忌卒自戕賊遂致強本刊落醇風鏗裂將帥携離兵卒驕惰迫其亡也忠孝等軍構難于內紕軍難人召禍于外向之所謂志一而

力齊者不見可恃之勢豈非自壞其家法所致與

元

初以武功定天下四方鎮戍之兵亦重矣然自其始而觀之則太祖太宗相繼以有西域中原而攻取之際屯兵蓋無定向世祖之時海宇混一然後命宗王將兵鎮邊徼襟喉之地而河落山東據天下腹心則以蒙古探馬赤軍列大府以屯之淮江以南地盡南海則名藩列郡又各以軍漢及新附等軍戍焉承平既久將驕卒惰軍政不脩而天下之勢遂至于不可爲矣

各路立萬戶府各縣立千戶所以鎮壓各處其所部之軍每歲第遷口糧府縣關支而各道以宣慰司元帥總

之

世祖中統三年九月詔益都行省大都督撒吉思與董文炳會議兵民籍每十戶惟取其二充武衛軍其海州東海州東海漣水移入益都者亦隸本衛 至元十一年正月勅荆湖行院以軍三萬水弩砲手五千隸淮西行院 是年六月勅合荅選部下蒙古軍五千人與漢軍分戍沿江堡隘爲使傳往來之衛 十五年九月詔分揀諸路所括軍驗事力乏絕者爲民其特權豪避役者復爲兵又減至元九年所括三萬軍半以爲民其商戶餘丁軍並除之 二十二年令福建黃華畬軍有恒產者爲民無恒產與妻子編守城軍

成宗元貞二年樞密院臣言江南近遼州縣宜擇險要之地合群戍爲一屯卒有警急易於徵發詔行省圖地形覆軍實以聞大德元年十二月中書省臣言世祖撫定江南沿江上下置戍兵三十一翼今無一二懼有不虞外群戍卒封樵斂軍官遷延不以時取而以已錢貸之徵其倍息逃亡者各處鎮守官及萬戶府並遣人追捕皆非所宜帝曰卿言良是二年九月命廣海左右江戍軍依舊制以二年或三年更代

文宗天曆元年冬十月罷內郡及行省兵

順帝至正十年冬十月中書奏東南千里外妖氣見合立兵馬司以掌防禦遂置大東平濟南徐州四兵馬司

十四年立南陽鄧州等處毛胡蘆義兵萬戶府募土人爲兵免其差役令討賊自効因其鄉人自相團結號毛胡蘆故以名之 是年立淮東等處宣慰司置司天長縣統濠泗義兵萬戶府并洪澤等處義兵 又置大兵農司保定河間武清景薊共四處其屬又有兵農千戶所二十四百戶所四十八鎮撫司四 十七年春正月命山東團結義兵每州添設判官縣添主簿各一員專率義兵以事守禦仍命郡守提調聽宣慰司節制 十一月詔天下團結義兵路府州縣正官俱兼防禦事 十八年二月議團結山西大小十一處以爲保障命中書右丞塔失帖木兒左丞烏古孫良禎等總行提調

設萬夫長千夫長百夫長編立牌甲分守要害互相策應九月中書左丞張冲請立團練安撫勸農司二道一奉元延安等處一鞏昌等處從之

胡粹中曰兵貴精不貴多將在和不必衆添設帥領團結義兵不足以禦敵適足以資敵耳田豐等十萬戶相繼背叛而山東先失圍結果何益哉

果毅軍 至正乙未秋杭破越民結義固守江南行臺官傲邁里古思總統義民護城池乃更募得勇悍者三千餘人以果毅二字爲號曰果毅軍時御史大夫拜住哥又自統軍三千曰臺軍 吳良佐華亭人好學有才氣至正兵起總帥與語大悅版授華亭尹辭請以白衣

議事帥賢之俾自集白甲保障鄉里全活者數千家

續文獻通考卷之一百六十二終